

# 開放文學 – 歷代筆記 – 夷堅丙志 第十四卷

張五姑 外舅女弟五姑。名宗淑。自幼明慧知書。既笄。嫁襄陽人董二十八秀才。董懦而無立。淑性高亢。庸奴其夫。鬱鬱不滿。至於病瘵。靖康之冬。郭京潰卒犯襄鄆。董死於漢江。明年。淑從其母田夫人至南陽。飲酒笑嬉。了不悲感。宿病亦浸瘳。方自欣慶。一旦無故嘔血門餘不止。心疑懼。使呼○○○○語曰。和中不可再嫁。嫁當殺汝。和中蓋淑字。雖家人皆不知之。淑識其聲為故夫。叱曰。我平生為汝累。今死矣。尚復繳繞我。使我再歸他人。何預汝事。巫無語而蘇。淑固自若。會外舅來南。挈與偕行。至揚州謀婿。將以嫁王趨。淑曰。一生坐文官所困。不願再見之。得一武弁足矣。遂適合門宣贊舍人席某。時二年五月。董氏喪制猶未終。其冬。席生又死於盜。淑隨母兄度江。寓溧陽。三年三月晦。夢席生自牖掙其頭。覺而項痛。丹瘤生左頰。臥病逾月。昏昏不能知人。二[女更]往視之。笑曰。姑夫恰在此。聞姪姪至去矣。問為誰。曰。二十八郎也。自是但與董交語。以至於亡。明年。其母在達州。夢淑與人聚博於樓上。猶如在生時。母責之曰。賭博從曉連夕。豈是女子所為事。淑忿怒化為旋風。逐母至床。母驚號曰。鬼擊我。子婦急起視。則身已半墮地。明日不能起。兩月而卒。

宜都宋仙

宣和中。外舅為峽州宜都令。盛夏不雨。遍禱諸祀。無所應。邑人云。某山宋仙祠。極著靈響。乃具饌謁其廟。財下山。片雪已起於山腹。方烈日如焚。忽大雷雨。百里沾足。邑人戴神之賜。相與出錢葺其廟。而莫知仙之為男為女。考諸圖志。問於父老。皆無所適從。外舅晝寢。夢大輿自外來。幡蓋麾旄。儀物頗盛。巍然高出於屋。私念言縣門卑陋。安能容此。轉眄間已至廷中。跋而窺之。則婦人晬容祿飾坐其內。驚起欲致敬。倏然而寤。乃命塑為女仙象。未及請廟額。而移官去雲。

劉媪故夫

唐州人張文吉。下世十餘年。妻劉氏。年且八十。白晝逢故夫。挽其衣使行。曰。相與歸去。無為久住此。相持不解。劉遂仆地。其季子至前。掖張翁去。曰。困吾母如是。何也。又扶媪起立。然後去。媪長子及婦孫輩。見老人乍僕乍起。趨視之。歷歷聞其言。時季子亦死久矣。咸憂懼知為不祥。未幾媪死。

錫盆冰花

外舅清河公。紹興六年。以中書門下省檢正官。兼都督府咨議軍事。往淮西撫諭張少保軍。留家於建康。十二月十五日生辰。家人取常用大錫盆洗滌。傾濁水未盡。盆內凝結成冰。如雕鏤者。細視之。一壽星坐磐石上。長鬚覆之。一龜一鶴分立左右。宛如世所圖畫然。外姑劉夫人。命呼畫工寫其狀。工所居遠。比其至。已消釋矣。自是無日不融結。佳花美木。長林遠景。千情萬態。雖善巧者用意為之。莫及也。迨春暄乃止。而外舅有兵部侍郎之命。春渚記聞。有葛□之一事甚相似。

王八郎

唐州比陽富人王八郎。歲至江淮為大賈。因與一倡綢繆。每歸家。必憎惡其妻。銳欲逐之。妻。智人也。生四女。已嫁三人。幼者甫數歲。度未可去。則巽辭答曰。與爾為婦二十餘歲。女嫁有孫矣。今逐我安歸。王生又出行。遂攜倡來。寓近巷客館。妻在家稍質賣器物。悉所有藏篋中。屋內空空如窶人。王復歸見之。愈怒。曰。吾與汝不可復合。今日當決之。妻始奮然曰。果如是。非告於官不可。即執夫袂走詣縣。縣聽化離。而中分其貲產。王欲取幼女。妻訴曰。夫無狀。棄婦嬰倡。此女若隨之。必流落矣。縣宰義之。遂得女而出居於別村。買瓶罌之屬。列門首。若販鬻者。故夫它日過門。猶以舊恩意。與之語曰。此物獲利幾何。胡不改圖。妻叱逐之。曰。既已決絕。便如路人。安得預我家事。自是不復相聞。女年及笄。以嫁方城田氏。時所蓄積已盈十萬緡。田氏盡得之。王生但與倡處。既而客死於淮南。後數年。妻亦死。既殯將改葬。女念其父之未歸骨。遣人迎喪。欲與母合祔。各洗滌衣斂。共臥一榻上。守視者稍怠。則兩骸已東西相背矣。以為偶然爾。泣而移置元處。少頃又如前。乃知夫婦之情。死生契闊。猶為怨偶如此。然竟同穴焉。

楊宣贊

唐州相公河楊氏子。聚於戚里陳氏。得官至宣贊舍人。平生喜食雞。所殺不勝計。晚年瘡發鬢間。未能為甚害。家所養雞。忽中夜長鳴。大惡之。明日殺而炙之。復以充饌。未下嚙。瘡毒大作。鬢滿一面。久之稍愈。而潰汁流至喉下。齧肌成穴。殊與雞受刃處等。鮮血沾滴無休時。竟死。右六事皆聞於妻族。

忠孝節義判官

楊緯。字文叔。濟州任城人。為廣州觀察推官。死官下。喪未還。其姪洵。在鄉里。一日晡時。昏然如醉。欵見緯乘馬從徒而來。洵遽迎拜。既坐。神色翛然如平生。洵跪問曰。叔父今何之。曰。吾今為忠孝節義判官。所主人問忠臣孝子義夫節婦事也。從容竟夜。旁人但見洵拜且言。皆怪之。將行。二紫衣留語曰。府君好范山下石台。何不就彼立祠。洵忽寤。告家人曰。適廣州叔父至云云如此。眾悲駭。因呼工造像。工技素拙。及像成。與緯不少異。始知其神。然以官不顯。又無跡狀。故州縣不肯上其事。祠竟不克立。緯生為善人。所居官。專務以孝弟教民。正直好義。故沒而為神。考諸傳記。蓋未嘗有此陰官也。見晁無咎集龍可前知

東平龍可。字仲堪。邃於曆學。能逆知未來事。宣和末。趙九齡見之於京師。趙以父病急歸。遇可於門。可曰。京師將有大變。吾亦從此去矣。扣之。曰。火龍其日。飛雪滿天。明年。金虜犯都城。以丙辰日不守。時大雪連。皆符其語。

水月大師符

紹興二十一年。襄陽夏大雨。十日不止。漢江且溢。吏民以為憂。襄陽知縣閻君謂同寮曰。事急矣。吾有策。可令立止。雖近巫怪。然不敢避此名也。遂命駕出城。至江上。探懷中符投之。酌酒三祭而歸。是夜雨止。明日水平如故。一郡敬而神之。臨川李德遠。時為觀察推官。就扣其說。閻具以教之。曰。但如我法。人人可為之。無他巧也。其法以方三寸紙。朱書一圈。而外繞九重。末如一字。書水月大師四字於其上。凡水旱疾疫刀兵鬼神山林木石之怪。無所不治。遇凶宅妖穴。書而揭之。皆有奇效。德遠歸臨川。其姪婦每至晡時。輒為物所憑。新妝易衣。坐於榻以伺。少頃。則與人嬉笑謔浪。竟夜乃息。德遠密書符貼戶限內。婦不知也。明日在床上。見偉男子冠帶如常時而來。及房外。若有所礙。戟手罵曰。賤女子。忍遽忘我乎。婦應曰。我未嘗有此心。何為發是語。男子舉足欲入。終不能前。遂去。婦灑然如醉而醒。始為人言之。蓋罔罔累旬。了不知身之所寄也。自是遂安。予為禮部郎日。德遠為太常主簿。同行事齋宮。為予書之。然未之用也。

賈縣丞

李德遠。紹興二十七年。調官臨安。館於白壁營。與福州姚知縣同邸。時方盛夏。每夕納涼於後軒。姚之舊友賈縣丞。來料理。雲失告身事。所居相去百步。早出暮還。必過姚話夜。李因得識之。賈丞長安人。談驪山宮闕故都井邑之盛。袞袞可聽。又嘗為縉雲丞。說鬼仙英華事跡。尤有據依。姚李更買酒設果。與之款接。凡兩月。始各捨去。又二年。李為敕令所刪定官。局中從容與同僚唐信道。語及怪神。唐具述英華之故。李應答如響。唐曰。君何以知之。以所聞告。唐駭曰。得非長身多髯者乎。曰。然。陝西人乎。曰。然。曰。是人自縊雲罷即死。其兄葬之於某處。吾送之窆乃反於今年矣。安得如君所云者乎。李方追懼。毛髮為灑淅。徐思之。相從如是久。而未嘗白晝一來。雖同飲啄語笑。然其坐常去燈遠。元不熟審其面目。今知乃鬼爾。姚生別後歲餘而殂。

鄭道士

建昌王文卿、既以道術著名、其徒鄭道士、得其五雷法、往來筠撫諸州、為人請雨治祟、招呼雷霆、若響若答、紹興初來臨川、數客往謁、欲求見所謂雷神者、拒之不克、乃如常時誦咒書符、仗劍叱吒、良久陰風肅然、煙霧虧蔽、一神人峨冠持斧、立於前、請曰、弟子雷神也、蒙法師招喚、願聞其指、鄭曰、以諸人欲奉觀、故遣相召、無它事也、神恚曰、弟子每奉命、必奉上天乃敢至、迨事畢而歸、又具以白、今乃以資戲玩、將何辭反命於天、此斧不容虛行、法師宜當之、即舉斧擊其首、坐者皆失聲驚僕、移時方蘇、鄭已死矣、右三事皆李德遠說

黃烏喬

邵武黃敦立、少時遊學校、讀書不成、但以勇膽戲笑、優游閭里間、邑人以其色黑而狡譎、目之曰烏喬、所居十里外有大廟、鄉民事之謹、施物甚多、皆門外祝者掌之、黃欲取其縑帛以嫁女、祝知難以詞卻、姑語之曰、君盍以杯琰卜、若神許君、無不可者、黃再拜禱曰、積帛廟中、頗為無用、移此以惠人、神所樂也、而庸祝不解神意、尚復云雲、大王果見賜、願示以聖琰、或得陰琰、則夫人垂憐、尤為上願、若得陽琰、則闔廟明神、皆相許矣、祝不敢言、竟負帛以歸、它日、與裡人會、或戲之曰、君名有膽、今能持百錢詣廟、每偶人手中置一錢、然後歸、當醢酒肉以犒君、黃奮衣即行、二少年輕勇者、陰跡其後、問道先入廟、雜於土偶間、窺其所為、有頃黃至、拜而入、曰、黃敦立來施錢、大王請知、遂摸索偶像、各置其一、或手不可執、則置諸肩上、俄至少年所立處、突前執其臂、黃以為鬼也、大呼曰、大王不能鈐勒部曲、吾來俵錢、而小鬼無禮如是、又行如初、略無怯意、既畢事、扃廟門而出、其黨始歎服之、溪北舊有異物、好以夜至水濱、見徒涉者必負之而南、或問其故、答曰、吾發願如此、非有求也、黃疑其必為人害、詐為它故、連夕往、是物如常態、負而南、後三日、黃謂之曰、禮尚往來、吾煩子多矣、願施微力以報、物謝不可、黃強舉而抱之、先已戒家僕、束草然巨石、財達岸、即擲於石上、其物哀鳴丐命、及燭至、化為青面大獾矣、歐殺投火中、環數里皆聞其臭、怪自此絕、徐搏說

綦叔厚